



BABAYE, NGANONG NAGAHILAK IKAW? NI MARK R. PUGH

Ang Daghang mga Saksi sa Iyang Pagkabanhaw

“Mituo ko sa daghang mga saksi sa Pagkabanhaw sa Manluluwas Bag-ong Tugon—kang Pedro ug sa iyang kaubanan sa Napulog Duha ug sa minahal, putli nga Maria sa Magdala, taliwala sa uban pa. Mituo ko sa mga pagpamatuod nga makita diha sa Basahon ni Mormon—kang Nephi ang Apostol ug sa wala hinganli nga mga katawhan sa yuta sa Bountiful, taliwala sa uban pa. Ug ako mituo sa pagpamatuod ni Joseph Smith ug ni Sidney Rigdon kinsa, human sa daghan nga mga pagpamatuod, mipahayag sa mahinungdanong pagsaksi niining katapusang dispensasyon ‘nga siya buhi! Kay kami nakakita kaniya.’ Ubos sa Iyang mga mata nga makakita sa tanan, ako mobarug isip usa ka saksi nga si Jesus sa Nazaret mao ang nabanhaw nga Manunubos, ug ako mopamatuod bahin sa tanan nga resulta gikan sa *kamatuoran* sa Iyang Pagkabanhaw. Unta madawat ninyo ang konbiksyon ug kahupayan nianang samang pagsaksi.”

Elder D. Todd Christofferson sa Korum sa Napulog Duha ka mga Apostoles, “Ang Pagkabanhaw ni Jesukristo,” *Liahona*, Mayo 2014, 114.

Personal nga Paggamit: Bisan dili kita apil niadtong nakakita sa nabanhaw ug nahingpit nga lawas sa Manunubos, makahimo gihapon kita karon sa pagbarug isip mga saksi Kaniya. Mahimo Siyang kanunay nga sentro sa atong kinabuhi, bisan sa unsang panahon o dapit kita maanaa. Matag higayon nga atong ihalad ang atong kasingkasing ug mga kamot sa pagserbisyo sa uban; sa pagpakita og kalumo, kamabination, ug pagtahud ngadto sa tanan; sa pagpanalipod sa kamatuoran; ug sa pagpaambit sa atong mga pagpamatuod sa ebanghelyo, nagbarug kita isip tinuod nga mga saksi ni Jesukristo.

DETALYE GIKAN SA LAKAW, UBAN KAWAKO, NI GREG OLSEN, DILI MAHIMONG PAKOPYAHAN

Dili Kita Angay nga Maglakaw nga Mag-inusara

“Usa sa dakong kahupayan niining kasaulugan sa Pagkabanhaw mao nga tungod kay si Jesus mibaktas sa ingon ka taas, masulub-ong agianan nga nag-inusara, dili na *kita* kinahanglang mohimo pa sa ingon. Ang Iyang biyahe nga nag-inusara naghatag og lapad nga pakig-uban alang sa atong gamay kaayo nga luna niana nga agianan—sa puno sa kalooy nga pag-amuma sa atong Amahan sa Langit, sa walay pagkapakyas nga pakig-uban niini nga Pinalanggang Anak, sa bug-os nga gasa sa Espiritu Santo, sa mga anghel sa kalangitan, sa mga sakop sa pamilya nga anaa sa duha ka bahin sa tabil, sa mga propeta ug mga apostoles, sa mga magtutudlo, sa mga lider, ug sa mga higala. Tanan kini ug daghan pa gihatag isip mga kaubanan sa atong mortal nga panaw tungod sa Pag-ula ni Jesukristo ug sa Pagpahiuli sa Iyang ebanghelyo. Gipalanog gikan sa kinatumyan sa Kalbaryo ang kamatuoran nga kita dili gayud mapasagdan nga mag-inusara o dili mabuligan, bisan kon usahay bation nato ang ingon niini. . . .

“ . . . Kita mobarug unta kauban ni Jesukristo ‘diha sa tanang panahon ug sa tanang mga butang, ug diha sa tanan nga mga dapit nga [kita] unta maanaa, bisan hangtud sa kamatayon,’ labing tinuod ingon niana kon giunsa Niya sa pagbarug nga kauban kita nga sa pagkatinuod Siya *nagpakamatay* alang kanato ug dihang Siya mibarug nga hingpit nga nag-inusara.”

Elder Jeffrey R. Holland sa Korum sa Napulog Duha ka mga Apostoles, “Walay Bisan Usa nga Nakig-uban Kaniya,” *Liahona*, Mayo 2009, 88.

Personal nga Paggamit: Niining Pasko sa Pagkabanhaw, hinumdumi ang katapusan, nag-inusarang panaw sa Manluluwas. Gisakripisyo Niya ang tanan nga anaa Kaniya aron kamo ug ang matag tawo dinhi sa yuta mamahimong limpyo ug makabaton og kinabuhing dayon. Pagkat-on gikan sa Iyang hingpit nga ehemplo. Ibutang Siya kanunay diha sa inyong hunahuna ug diha sa inyong kasingkasing. Ug hinumdumi kanunay nga wala kamo mag-inusara. Tungod kay gilahunay Niya ang Iyang katapusang panaw diha sa hingpit ug tumang pag-inusara, dili Siya mobiya kaninyo. Ang Iyang gugma alang kaninyo walay kinutuban ug walay kausaban, ug andam Siyang mohatag kaninyo og kalinaw, kahupayan, ug paglaum samtang mopadayon kamo sa inyong kaugalingong panaw. Ang Iyang gasa sa Pag-ula walay katapusan, ug gihatag kini nganha kaninyo. ■

Tan-awa kon sa unsang paagi ang Pagpalabay makatabang kanato nga makasabut sa Pasko sa Pagkabanhaw diha sa [lds.org/go/41817](https://www.lds.org/go/41817).

